

Aultrement :

« Lan trois cens trente et ung apres mille, Guichard
Prince, lyon de cœur, geant et leopard ,
Hardy guerrier, ayment noblesse vertueuse ,
Non vaincu de soldatz en guerre furieuse ,
Est vaincu de la mort. Quau haut ciel azure ,
A toujours, mais en heur, soit son lieu assure. »

Le deuxieme filz dudit Loys, seigneur de Beaujeu fut nommez Humbert, lequel fut seigneur de la Julliane et fut chanoïne de saint Jehan de Lyon. Il mourut à la bataille de Varry qui fut entre le daulphin de Vienne et le comte de Savoye.

Le troisieme filz dudit Loys fut appelle Guillaume, qui fut evesque de Bayeux, et trespasa l'an mil trois cens, le vingt-septieme jour doctobre et fut ensevely aux Cordelliers de Villefranche au tombeau de madame Helienor, sa mère, avec merveillex triomphe, honneur et devotion, a l'augmentation dudit couvent. Et aussi furent ensepulturez, audit tombeau, Thomas et Loys, enfans dudit Loys de Beaujeu moult honorablement. Le premier deulx, cest a savoir messire Thomas qui mourust le vingtquatrieme jour de juing de lan mil trois cens, et monsieur Loys audit an mil trois cens, le..... jour du mois de...

Après le trespas de mondit seigneur Guichard le Grand, gouverneur et conseiller des cinq roys de France dessus nommez, succeda en la baronnie, terre, seigneurie de Beaujeu, messire Eddouard, son aîné filz, lequel fut engendre dudit seigneur Guichard et de madame Marye de Chastillon, fille du sieur de Chastillon, qui fut connestable de France, et fut sa deuxieme femme. Et nasquit ledit Eddouard le jour de Pasques lan mil trois cens et seize.

Ledit messire Eddouard fut ung tres hardy seigneur et prince, en ensuyvant les bonnes meurs de messire Guichard